

隨園全集

瑤華閣詩草

瑤華閣詞鈔

瑤華閣詞鈔補遺

隨園全集之廿八

瑤華閣詩鈔

姚澹愚署

中華民國十年
上海商務印書
局總發行所

序

自余先大父有三妹合稿之刻迄余姊妹輩無不樂習爲詩而其中雄于才者首推伯姊瑤華姊性慧幼承先君子教習詩兼習長短句長更肆力于古而詩詞遂以大成近姊夫吳伯鈞褒姊詩詞各一卷將付梓人寄以示余噫與吾姊別二十餘年矣憶庚子歲余西走蜀姊偕伯鈞亦相繼東走閩凡夫山水之奇險風雨冰霜之勞苦宦途世路之崎嶇余習嘗之姊亦習見之其發之爲詩詞之妙也亦固其宜惟回思兒時坐隨園雙湖亭子上邀姊同三五弟妹掬月弄花徵歌賭酒此景此情如彩雲影散杳不可覓而堂姊柔吉殉難金陵仲兄小村亦死節上海吾姊又睽隔數千里不知相見於何日死生聚散之感其能已乎所慰者姊于歸後家道日隆諸子俱得功名克自樹立今雖隨宦異鄉而白頭偕老夫婦唱喁之樂有遠過于秦嘉徐淑者益知女子有才無福之說爲不足信矣至姊詩詞得力之處識者自辨之何待余之贅言哉

咸豐乙卯冬月弟祖惠謹識于西蜀雲陽署中之西齋

胡序

在昔湘蘋采苕之歌詠絮銘椒之什白雪桃花之祝明珠柳葉之詞靡不擷秀紅閨擷華彤管豈獨鮑家小妹香茗裁篇隋苑相如紅箋琢句瑤華主人生長詩書夙耽翰墨珊瑚架筆不畫烟螺玳瑁裝函喜臨春蚓青燈落葉夜分而不倦披吟黛管生花粧罷而時勤揮灑家擅學林代授伏生之業人遊藝圃端齊左氏之才僕生長隨園備聆芳懿雖樞內之言不傳其篇什而閨中之秀夙仰其才華及歸於伯英司馬也瑤琴靜好繡閣嬾嫻秦嘉徐淑詩篇增伉儷之歡清照明誠吟管益倡隨之樂雖復擗擋齏鹽恪共蘋藻佳兒伴讀燈邊哦月露之詞健婦持家林下率煙霞之性望夫君兮天末緘札親裁吟淑女於花前組紉不廢迄乎浦江載渡閩嶠偕行紺荔紅蕉益潤銀毫之色仙霞香雪爭芳斑管之華篇帙尤多吟哦更富凡夫宋豔班香之秀江花謝草之英羚羊香象之奇鏤月裁雲之雋無不鏘洋在口組紉因心號作者以何慙雖專門有不及今當割劘遠屬弁言僕十載睽違一官坎壈巖邊羽檄盡日勞形故國青山不堪回首憶金猊翠燭之場杳如昨夢念竹馬鳩車之歲同侍吟壇用誌前塵敢辭不敏嗟夫胡笳拍苦雜佩歌遙紅袖工愁綠衣善怨澧蘭泥芷風淒嬖女之砧綠竹清湘月冷皇娥之瑟歌成紈扇之詩每題秋恨織就璇璣之字半寫春愁遂疑女子多才生常薄命竟似名流不遇詩可窮人豈知遇並才豐慶緣善積齡逾花甲福備林壬登之梨棗無慚女誠之篇鏤以莒華大變閨愁之例愚表弟胡元博謹序

咸豐八年書於武陵運署

簪雲閣詩詞集序

天將牖其人以成一家之名非窮恃有學問也必先與以過人之聰明而後有過人之才調詩詞其最著也是以名家難求名家於閨秀之中尤難予嘗持此說以質之伯鈞表弟亦以爲然伯鈞深於此者也予自辛亥之春罷官居榕城與同社諸君閒爲文酒之會伯鈞公暇必與焉酬唱之餘縱談古今詩詞諸名家議論多吻合因出其德配袁安人簪雲閣詩詞藁見示屬商訂而爲之敘蓋安人爲袁簡齋先生之女孫蘭邨先生之長女也簡齋先生高才博學一代宗工所著小倉山房集海內珍如拱璧蘭邨先生聰穎特達世其家聲所著捧月樓詞予嘗誦之其綺麗繚邈較之南宋諸家有過之無不及安人賦性穎異髫髻時讀祖父詩輒怡然意開即能寄託韻事研究倚聲之學蓋得於過庭之教深矣予昔遊京師與安人仲弟小邨大令晨夕過從試館聯牀挑燈話舊側聞安人同懷弟妹多工吟詠携囊扣鉢殆無虛日而所居小倉山房園亭清逸花木暢盛四時之樂不同曉暮恣其玩賞維時簡齋先生早歸道山蘭邨先生方啟陳芳之國主騷雅之壇曹倉鄴架卷軸紛披孔尊郇廚裙屐咸集然則安人居遊有林泉之美披覽多匱石之書而又萃四方名下麗句清詞供其考鏡用能探源於風雅博依乎載籍寫至情以真摯寄逸響於清華聞小邨之言益知安人詩詞之所造亦遭際有以成之也今觀其集中懷古感時諸作沈著痛快無閨閣氣習即尋常贈答詩亦不憚推敲而務期研鍊杜陵所謂律細於老不其然歟至其尋聲按拍造語清腴比之白石屯田何多讓焉亟屬伯鈞付諸剞劂氏俾戚黨中先覩爲快又豈僅淑德嫻行堪爲女宗哉然則吾謂有過人之才調必先有過人之聰明不特於閨秀中罕見之即於名家中亦

罕見之也豈虛語哉謹爲之序而歸之金陵夏愷序

師祁自咸豐八年宰臨汾迎奉吾母由閩來晉公餘嘗請以母所詠詩詞付梓吾

母訓曰汝承乏衝要當盡心民事期信友獲上母亟此況我詩詞皆性情觸發意到筆隨少時作無存者中年草藁散失亦多今老矣親友四散無復興致爲此韻語且不自信恐貽當代知者譏屢請屢止然師祁曾侍先君子誦吾母稿曰胎息騷選出

入經史不愧女宗顧謂師祁弟兄他日有餘貲亟應鐫板以傳家乘兼誌汝母慧且

賢逮事重慈敦親睦族教子承家無似爾祖蘭園詩草至今無存爲一生恨事嗚

呼先君子言猶在耳師祁等敢忘前訓今固請於吾母謹編詩二卷詞一卷付刻

適兄師祁弟師曾各以參校鈔本寄晉值四妹謹儀歸甯因相與校刊惟師祁讀書不

多未諳體例擬請大雅方家閱訂並

賜序弁之卷首另裝成帙焉同治六年嘉平月金陵吳師祁謹誌於榆次官廨

壽序

易曰家人有嚴君焉父母之謂也嚴也者正家之要然父過於嚴恐違子與氏責善之誠故嚴必繼以慈母道本慈寓嚴於慈而後正位乎內家人所以利女貞也金陵袁太宜人爲隨園先生袁公孫女前福建南平知縣吳伯嫫先生正室嚴以正家以母道兼父道年七十矣哲嗣子選大令於今春設帨之辰述其母教屬序於和以平日登堂拜母在子姓之列敢以不文辭夫周以前婦職之克傳者多以德秦漢以後多以節與才而最著者莫如相夫子成令名以及其賢子孫爲人子者能以其母之賢爲母壽則其所以壽者大方伯嫫先生之由太學生工舉子業也屢不得志於有司海內巨公儀其聲望倒屣投轄爭自禮羅常不家食焉故家政全資內助太宜人于歸時年十九賢淑之聲溢於里巷令祖蘭園先生謝世家計蕭條其時祖姑江太宜人姑鄭太宜人皆在堂太宜人主中饋侍養必豐故能得重闈歡內外無間迨重闈棄養事事皆中典禮向平婚嫁次第施行至今鄉人稱爲巾幗丈夫洵無愧焉吳氏爲洞庭山著姓遷徙金陵以大令起家自蘭園先生由拔萃官廣東陽江縣伯嫫先生由內廷謄錄官福建南平縣子白大令以附監生官直隸盧龍縣子選以名孝廉大挑分發山西今官榆次縣季弟子沂以縣丞需次閩疆子白令嗣候選鹽場祖孫父子兄弟濟美一門代承清白是以太宜人恒正色訓諸子曰余非望爾等祿養也但勉爲循吏無忝於廉吏子孫於願足矣和與哲嗣子曰締交京師與子選同官山右知之最深現同膺赤緊論者皆稱爲善地謂其物產之美也賦額之多也戶口之庶也置郵之便也然而物產美則徵求衆賦額多則簿書積戶口庶則訟獄滋置郵便則奔走折節應給不暇兩大令奉政宣化

肆應裕如知其稟承母教也有由來矣太宜人生長隨園家世工詩尤嗜讀史著有瑤華閣詩詞各二卷其中讀史誌異居多因思江左靈秀間鍾於閨閣邗江楊德基以讀李白詩傳桐城張令儀以蠹窗詩集傳太宜人屏去風雲月露之章而以詩代史間嘗觀古今得失發爲歌詠皆可被之管絃生平性至孝子選之迎養於晉也太宜人由閩南北來繞道滬濱省視慈親汪太淑人值道梗由乍浦航海而東中流忽過颶風見巨魚勢若吞舟舟幾於覆忽於波濤震驚中聞撲鼻檀香颶風乃息得以化險爲平蓋孝之格於神明若此居恒最儉約而好施予嘗脫簪珥合藥以濟人所存活者甚多其就養山西由平河再遷省官每日除禮佛外含飴弄孫和見諸孫頭角崢嶸讀書識字讓棗推梨江夏黃童抑何早慧諸婦善伺起居希旨承顏亦都能稱太宜人意子選年逾強仕出告反面仍謹幼儀皆太宜人之嚴訓致之也今春三月設悅之辰獻壽者實繁有徒有觥有壺有爵有觚或脯或脍溢於庭除子婦拜於前諸孫拜於後乘龍承鳳羅拜於旁太宜人其欣欣然進一觴乎和於是揚觶進而祝曰坤厚載物其德無疆積善之家必餘慶太宜人儉以持己敬以事上慈以待下數十年如一日而又持家之正教子之嚴三子之各得一官潔已愛民爭自樹立以慰太宜人也若此則以今日之康強卜他日之耄耄繩繩翼翼縣縣延延將見子伯昆季騰達於朝廷諸孫蟬聯于科第爲善不期報乃分之宜而爲善無不報乃理之常天之福我太宜人正未有艾也和故謹述之以誌鄉里之光榮而祝岡陵之景慶云爾

同治三年甲子三月

壽序

愚姪汪 和拜序

蓋聞天開壽字龍壇呈元甲之圖人是福星鸞誥拜重申之命是以西池瑤瑛介景運者世際中興南極珠躔應壽昌者輝聯上界恒春樹下和風約穆滿之謠長樂花前夜月奏霓裳之曲何必廖家古井始獲丹砂詎須鄞縣清泉纔多紫菊則有野分斗次光連婺女之津家在江南春煖麻姑之酒十洲賦就祥光偏照於東瀛五嶽圖呈瑞靄先呈於南戒葛仙井畔世享大年陶氏谷旁人多上壽芝採三莖之秀玉女傳觴宴舒七葉之祥金妃設悅恭維我吳年伯母袁太宜人乃隨園先生之孫女蘭村明府之女也稽其譜系望出陳留詳厥里居家原浙水樹甘棠於北固曾扇仁風遷喬木於東山相傳臥雪門有通德競誇白頭尙書坊號光延不減烏衣世胄太宜人幼而習禮長更敦詩族壓譚邢名齊顧陸幽蘭綉佩羣奉女宗香茗裁篇素嫺姆教世有龍門之望欣快壻之乘龍重居虎踞之雄擬才郎於綉虎爰夫待字以及初笄風詩詠之子于歸易象演家人之吉一燈佐讀成夫子之令名百兩宜家慰尊璋之夙願無何外庭則臯魚抱戚萬里奔馳高堂則孝鯉承歡重慈無恙環瑱宵撤學嬰兒之事親概散晨燭作季蘭之尸祭況阿翁騎箕之歲正冢婦鬢蓁之年職正勉乎相夫勤更聞於鬻子錦挑對璧襟擬連城既雙蓁之交輝復三枝之競秀趨庭是鳳竟同薛氏之三會食皆龍不羨荀氏之八厄匝鰲躡手自屏當鍼管絲麻親爲操作方冀重闈愛日永照堂前詎堪兩代慈雲同歸天上丈夫有四方之志射策京華傳家無半畝之田敝廬風雨相如橐筆久別鄉閭杜甫工詩尙居幕府遺其雜佩荷此門楣母以兼師恃而且怙處世值亨屯之會知廢知興置身在剝復之交不奢不儉雖溷裙笄之列思在古人縱居紈綺之儔身通大義料其才識鬚眉每歎不如測彼神機巾幘傳爲僅見想其數傳積德詎願人知累世行

仁祇承家訓蛇能蟠笥偏呈集慶之圖雀擬啣環洵食發祥之報吳公內助鄰里傳爲美談
袁粲外孫風韻都能相似賣犬營嫁甫牽嬌女之烏羊鳴鳳是古旋冀諸兒之錦雁僧彌爲
弟早薦賢書太傅諸郎羣稱國器弟兄叔姪一家皆吐鳳之英父子祖孫三代著飛鳬之績
宦轍先從於閩嶠象服隨夫養堂旋築於晉陽雞豚奉母魚軒阮氏佳兒遠過於許奇翟第
大家哲嗣更賢於曹穀鄰夫人年將耄耄神明不衰崔太常親奉朱輪觀瞻足壯勉官方以
清正毋忘酌水之風聞堦下之平反輒有加餐之樂公堂祿養偏捐五鼎之牲冠帔榮身猶
服七升之布褒輪周疊逾於架上之書榮誥駢闐積若床頭之笏聲傾都會咸欽秉禮之母
儀名動公卿羣羨知書之懿範至於多才多藝宜雅宜風夙嗜丹鉛尤耽邱索書簽翡翠玩
銀鴨之宵移硯匣琉璃聽銅蠡之晝滴成都粉紙雙丸豆蔻之香河北花箋百軸芙蓉之錦
共羨茂漪書格早擅簪花相誇道韞詩名不徒詠絮續班昭之別史無心留以示人敦令嫻
之雜文何意出而問世恒噴閨閣價懸呂覽之書不艷裙釵名掛蕭樓之選此又掃眉才子
未足比其清華不櫛書生詎能齊其焜燿而乃望鄉關而惆悵閱歷滄桑感親戚之流離心
傷風絮四方蕩析未消青犢之氣盡室團樂幸免紅羊之劫於是皈心乾竺托命金仙爲持
鹿女之經更禮龍華之懺回環往事綉佛青鶯感慨前塵飯僧白雀雍州無量之寺定現雙
花石頭彌勒之碑應來四鶴猶憶楂乘貫月如過弱水之洋曾聞香滿旃壇疑是慈航之渡
此皆積德之報抑亦呵護之靈而太宜人安不忘危貴而彌下嘯其善氣衍在吉祥種厥仁
風蒸爲戩穀術精濟世栽董奉之杏林書讀養生辨韓康之藥性入室則析鈴周市疑過石
慶之門居家而婢僕精勤咸守王褒之約含飴以弄陸子春車上璧人繞膝而嬉謝益壽風

前玉樹阮咸是姪居列竹林王筠爲甥成此宅相其人如玉壻皆坦腹之英洗手作羹兒有齊眉之婦一門羣從官箴悉稟夫阮姑阿大中郎家訓俱遵於邱嫂經傳絳帳共承講論於宣文貴識綠衣咸賴品評於潘母慈能下逮待澤者期功疆近之親惠以及人慕義者簞簠輝庖之輩遂以三遷之母訓用成一代之禮宗洵哉盛世之庥徵允矣德門之庇廕也已泰等與令嗣輩苔岑結契桂苑齊名久聞孟母之風愧乏江郎之筆鋪揚疇昔資皇娥拊瑟之懽詮次生平博天姥投壺之笑福者備也爲大順之統名壽者酬也乃至德之協應堂開四世三春報寸草之心壽享百齡七秩爲古稀之慶廿四番花開金谷爭誇富貴之春三千年桃熟瑤池知是神仙之樹茲以季春之月欣逢誕降之辰稱觥盡蓬島之賓獻賦當岡陵之祝試聽倉庚鳴處柘館風清恰逢上巳旬中蘭亭日麗將見賈家彪怒於畫錦揄帑韞王氏龍超戲斑衣而鞠臚橘中十支並奏雲璈竹裏雙妃齊翻寶瑟此日鶴籌益算七旬逢絳縣之期他年鳩杖長春千紀上丹邱之頌謹序

姻愚姪汪寶泰頓首

瑤華閣詩草

錢塘 袁綬 紫卿著

偶成

紫藤香豔蕙蘭清一樣芳馨兩樣分却怨水流焚不得羅衣欲換倩花熏

春日飲花下

俯仰境各殊所貴適吾意芳辰報花開就飲忍辭醉一盃助歡欣一盃澆磊塊借問種花者此意何人會

游雞籠山懷古

瓊樹歌殘璧月遙閒尋故碣認南朝草埋簪井胭脂冷蘿繞荒亭雉兔驕湖鏡幾窺紅粉倩山眉猶學黛蛾嬌臨春結綺知何處潮落空江恨未消

其二

依舊秦淮繞郭流珍珠河轉接荒邱千村萬戶環雲脚疊嶂層巒擁石頭復道記曾迴玉輦臺城可更護金甌我來凭弔斜陽裏烟靄倉茫起暮愁

水仙花

瘦影珊瑚種玉盤幽香一縷臭如蘭空階冷透梅花雪羅襪凌波獨耐寒

春宵不寐聽侍女彈箏

攤書就燈下漏盡不忍眠中庭悄無人明月空嬋娟花上露華溼屋角星河懸侍兒解人意纖指調冰絃一彈春鶯語再彈陌上桑側耳萬籟寂明月生輝光行雲何繾綣餘韻猶悠揚

掩卷淡忘言幽花吹清香

送春

一道綠陰濃春歸細雨中鴨頭新漲碧燕嘴落花紅曲徑苔侵檻深庭絮舞風啼鵲無賴甚
催去太匆匆

詠史

亡虜歸來思報復臥薪嘗膽是英雄五湖一棹烟波闊如此功臣竟善終 四皓安劉非
助呂戚姬空自淚縱橫若教如意爲天子未必能如孝惠明 壯髮初離宮女腹綠綈收
去使人疑當時庸主昏難及自殺嬌兒媚寵姬 餘蔭成功何足羨汾陽七子有誰賢一
軍盡甲存何意驕語還爭貴主前

將進酒

登離筵初進酒車麟麟在門守紅日近長安遙行復行心旌搖車麟麟出門走丈夫志忍回
首夕陽沈兮萬山暮車麟麟兮去何處望碧雲兮長相思天一方兮知不知

西鄰女

西鄰有好女間年纔十七水波凝風神冰玉琢肌骨芙蓉裁衣裳珊瑚盛妝飾十一誦經史
十二學紡織十三解吟詠詩成擬金石十四摹蘭亭刻劃簪花格十五十六餘桃李羞顏色
飄飄御仙風皎皎照秋月十七正盈盈門庭媒姬集阿母從旁言誰是乘龍客不求儀與貌
不爭嫌與帛願得同心人生作鴛鴦匹媒姬笑搖首道此誠難必不見東鄰女芳華越三十

春醒

落梅天氣雨初晴往事尋思別恨生怪度簾衣慵不卷綠窗人正倦春醒

擬古

東風吹暖江南草萋萋綠上長安道長安游子幾時還江南紅顏鏡中老流光如水春悠悠
還記年時送遠遊金勒未離芳草岸玉懷先上木蘭舟帆光人影遙相隔難憑青鳥傳消息
一樣園林花亂紅如何愁損花顏色黃昏最怕雨聲聲桐院蕉陰夜色沈驚回紫塞三更夢
滴碎紅閨一寸心鴨爐香燼蓮籌迴鐙暈圓紅搖瘦影春寒側側透羅衣把卷低徊嫌夜永
問郎何時錦衣還富貴容易離別難不看江上青青竹猶帶湘妃淚點斑

觀採蓮

日暮歌聲起前溪正採蓮渡頭逢浣女相與問華年

捲簾

纖纖微露畫樓頭一桁蝦鬚上玉鈎鏡裏春紅全面現屏間山翠兩眉浮軟風過處香難護
素月明時影欲流雙燕未歸深院靜亂蟬聲歇斷雲收

移榻

一卷桃笙妥貼橫商量何處愜幽情碧梧陰裏涼初覺紅藕香中夢亦清當戶莫嫌風料峭
臨池却愛水迴瀾良宵欹枕閒吟際不掃香塵對月明

雪藕

午夢惺忪睡起初解醒眞個勝醒酬千絲宛轉情難斷一握玲瓏玉不殊擘處最宜纖指爪
拈來剛稱雪肌膚幾回未忍銀刀試笑問伊人腕似無

浮瓜

清泉綠沁泛波時赤李冰桃總遜伊能使熱腸涼似雪可知風味美於飴圓浮水面疑荷蓋
渴解中宵勝荔枝記得晚來新浴罷金盤捧出碧琉璃

接家書

感時兼憶舊半載別愁侵去歲書同展今宵酒獨斟落花游子意明月故人心爲問長安客
春來思淺深

春日偶作

竟夕廉纖雨春寒傍晚曉加溼雲堆屋角乾鵲噪簷牙綠潤蕉抽葉紅蘇杏著花樓高塵事遠
別夢遶天涯

題獨坐幽篁裏圖

修篁拂晴嵐暗泉咽淒响泠泠夕露滋靄靄春雲蕩停琴獨延伫吟嘯恣幽賞小坐展苔茵
襟懷白蕭爽奚奴抱綠綺含睇若欣仰林深無俗喧境僻起遐想空外裊餘音涼陰月初上
聞雁

霜華如水浸庭陰根觸哀音感不禁似坐吳船聽夜櫓慣催越女急宵砧香寒紙帳三更夢
秋老關河萬里心可有尺書從北寄起看涼月滿遙岑

明樂安公主玉印圖

樂安公主光宗女身出天潢貴無比勅書下降漢才人都尉翩翩似蕭史簫合秦樓琴瑟歡
金蓮燭下任人看天錢撒帳春如海玉女乘鸞佳遇難金枝生小耽文翰異書賜出憑珍玩

錦軸牙籤萬卷橫
簪花格妙詞章
絢小印玲瓏玉色融
雲雷紋細篆來工
畫眉窗下攤書坐
素手親鈐一顆紅
百年佳耦人爭羨
雙修福慧神仙眷
不識人間兒女愁
那知世上滄桑變
罡風忽起委瓊花
一夕瑤清返鈿車
彩雲易向秋空散
都尉神傷鬢欲華
總帷虛掩人何處
長簾空牀愁日暮
想像音容入夢難
禪心已逐空花悟
一朝流寇犯神京
九廟烟塵帝主驚
鼎湖龍去乾坤破
獨木難支大厦傾
精忠都尉肝腸裂
媧皇難補金甌缺
兒女親看縛柱焚
冠裳書畫從灰滅
揭天鼙鼓震京師
國破家亡恨莫支
身留一劍酬君德
名播千秋答主知
九原相見應含笑
報國捐軀臣節耀
不愧天嫺有幾人
成佛生天還逆料
此印流傳二百年
閨房雅尙想從前
可憐玉石無情物
不管興亡色皎然

秋夕感懷

涼颼動羅幕
落葉下銀牀
淒淒烏夜啼
皎皎蟾生光
下階急砧杵
冷露沾我裳
舉頭望河漢
牛女隔紅牆
修到神仙儔
尙感參與商
碧城渺何處
青鳥方迴翔
所思不相見
極目秋茫茫

元宵寄外十韻

自君之出矣
春又返江干
一歲流光速
三秋別淚乾
團圓樂慶今
夕燈火憶長安
旅館朋簪盡
深閨倩影單
添香嫌漏永
把卷覺宵寒
風景他鄉異
人情兩地難
慎言敦友誼
努力博親歡
月桂期君折
泥金遲我看
姓名題雁塔
離思散眉端
畫錦還鄉里
萊衣膝下寬

銷寒第三集

宴雪 得冬字

東皇工剪水
一白失羣峯
花傍瑤台落
人疑月殿逢
移春還借酒
誤曉不聞鐘
極宴娛今夕